

天文

混沌初開，乾坤始奠。
氣之輕清上浮者爲天，氣之重濁下凝者爲地。
日月五星，謂之七政；
天地與人，謂之三才。
日爲眾陽之宗，月乃太陰之象。
虹名蜺蜺，乃天地之淫氣；
月裏蟾蜍，乃皓魄之精華。
風欲起而石燕飛，天將雨而商羊舞。
旋風名爲羊角，閃電號曰雷鞭；
青女乃霜之神，素娥卽月之號。
雷部至捷之鬼曰律令，雷部推車之女曰阿香。
雲師係是豐隆，雪神乃爲滕六。
焱火、謝仙，俱掌雷火；
飛廉、箕伯，悉是風神。
列缺乃電之神，望舒是月之御。
甘霖、甘澍，俱指時雨；
玄穹彼蒼，悉稱上天。
雪飛六出，預兆年豐；
日上三竿，乃云時晏。
蜀犬吠日，比人識見甚疏；
吳牛喘月，嘲人畏懼太過。
望切有若雲霓，恩深莫如雨露；
參商二星，每出沒不相見；
牛女兩宿，惟七夕一相逢。
羿妻奔於月窟，號爲嫦娥；
傳說死後精神，托於箕尾。
戴月披星，謂奔馳於早夜；
櫛風沐雨，謂勞苦于風塵。
事非有意，譬如雲出無心；
恩可遍施，乃謂陽春有腳。

饋物致敬，敢效獻曝之忱；
託人轉移，全賴回天之力。
感救援之恩曰再造，頌再生之德曰二天；
勢易盡者若冰山，事相懸者如天壤。
晨星謂賢人寥落，雷同謂言語相符。
心多過慮，何異杞人憂天；
事不量力，不殊夸父追日。
趙盾如夏日之可畏，趙衰如冬日之可愛。
齊婦含冤，三年不雨；
鄒衍下獄，六月飛霜。
父仇不共戴天，子道須當愛日。
盛世黎民，嬉遊於光天化日之下；
太平天子，致召夫景星慶雲之祥。
夏時大禹在位，上天雨金；
春秋孝經既成，赤虹化玉。
箕風畢雨，比庶民之願欲不同；
風虎雲龍，擬諸臣之會合不偶。
雨陽時若，係是休徵；
天地交泰，斯稱盛世。

地輿

黃帝畫野，始分都邑；

夏禹治水，初奠山川。

宇宙之江山不改，古今之稱謂各殊。

北京原屬幽燕，金臺乃其異號；

南京原爲建業，金陵又是別名。

浙江係武林之區，原爲越國；

江西是豫章之郡，又號吳皋。

福建省屬閩中，湖廣地名三楚。

東魯、西魯，卽山東、山西之分；

東粵、西粵，乃廣東、廣西之域。

河南在華夏之中，故曰中州；

陝西卽長安之地，原爲秦境。

四川古稱爲蜀國，雲南漢置滇池。

貴州僻處蠻方，荒服舊爲黔地。

東嶽泰山，西嶽華山，南嶽衡山，北嶽恆山，中嶽嵩山，此之謂五嶽。

饒之鄱陽，湘之青草，巴之洞庭，潤之丹陽，蘇之太湖，此之謂五湖。

金城湯池，謂城池之鞏固；

河山帶礪，實封建之誓盟。

帝都曰京師，故鄉曰梓里。

蓬萊、弱水，非飛仙不可渡；

十洲、三島，惟眞修乃可居。

滄海桑田，謂世事之多變；

河清海晏，兆天下之升平。

水神曰馮夷，又曰陽侯；

火神曰祝融，又曰回祿。

海神曰海若，海眼曰尾閭。

望人包容曰海涵；

謝人恩澤曰河潤。

無繫累者，江湖散人；
負豪氣者，湖海之士。
問舍求田，原無大志；
經天緯地，方是奇才。
空中起釁，謂之平地風波；
獨立不移，謂之中流砥柱。
黑子、彈丸，渺小之邑；
咽喉、右臂，要害之區。
獨立難持，一木焉能支大廈；
英雄自恃，丸泥可以封函關。
事先敗而後成，曰失之東隅，收之桑榆；
事將成而終止，曰爲山九仞，功虧一簣。
以蠡測海，喻人之見小；
精衛銜石，比人之徒勞。
跋涉謂行路艱難，康莊謂道途平坦。
瘠土曰不毛之地，沃壤曰膏腴之田。
得物無用，如獲石田；
爲學有成，已登道岸。
淄、澠之滋味可辨，涇、渭之清濁當分。
泌水樂飢，隱居不仕；
東山高臥，清節可風。
聖人出而黃河清，太守廉而越石見。
醇俗曰仁里，惡俗曰互鄉。
里名勝母，曾子不入；
邑號朝歌，墨子回車。
擊壤而嬉，上世之黎民自得；
讓畔而耕，西周之百姓相推。
長房有縮地之方，秦始皇有鞭石之法。
堯有九年之水患，湯有七年之旱災。
商君不仁而阡陌開，夏王無道而伊洛竭。
路不拾遺，由在上之有善政；

海不揚波，知中國之有聖人。

時序

爆竹一聲除舊，桃符萬戶更新。

履端爲首祚；

人日是靈辰。

獻椒花頌，爲祝遐齡；

飲屠蘇酒，可除癘疫。

新正曰首春，去年曰客歲。

火樹銀花合，言燈節之輝煌；

星橋鐵鎖開，謂金吾之放夜。

二月朔爲中和節，三月三爲上巳辰。

冬至百六是清明，立春五戊爲春社。

寒食是清明前一日，初伏是夏至第三庚。

孟夏乃爲麥秋，端午是爲蒲節。

六月六日，節名天貺；

五月五日，序屆天中。

競渡端陽，弔屈原之溺水；

重九登高，效桓景之避災。

二社燕鷄豚，群飲治鬻之酒；

七夕會牛女，家穿乞巧之針。

月朗中秋，唐帝神遊於月府；

九月風高，孟生落帽於龍山。

漢人蜡祭曰臘，故稱十二月爲臘；

秦皇御諱曰政，故讀正月爲征。

東方曰大皞，乘震而司春，故春曰青帝；

南方曰炎帝，居離而司夏，故夏曰赤帝；

西方曰少皞，當兌而司秋，故秋曰白帝；

北方曰顓頊，乘坎而司冬，故冬曰黑帝。

中央屬土，黃帝乘權。

夏至一陰生，天時漸短；

冬至一陽生，日晷初長。

冬至而葭灰飛，立秋而梧葉落。

月光都盡曰晦，月光復甦曰朔；
半圓半缺曰弦，月與日對曰望。
初一爲死魄，初二旁死魄，初三哉生明，十六哉生魄。

翌日、詰朝，皆言明日；
吉時、穀旦，悉是良辰。
片晌卽云片時，日曛乃云日暮。

疇昔曩者，俱前日之稱；
昧爽黎明，皆將曙之謂。

月分三漸，學足三餘；
以術愚人，朝三暮四；
爲學求益，日就月將。

焚膏繼晷，日夜辛勤；
俾晝作夜，晨昏顛倒。
自愧無成，曰虛延歲月；
與人偶語，曰少敘寒暄。

到處人情冷暖；
從來世態炎涼。

衰周無寒歲，暴秦無燠年。
泰階平曰泰平，時序和曰玉燭。
歲歉曰饑饉之歲，年豐曰大有之年。

唐世凶年，醉人爲瑞；
梁時儉歲，野苧堪憐。

豐年玉，荒年穀，言人品之可珍；
薪如桂，食如玉，言物用之騰貴。

春祈秋報，農父之常規；
夜寐夙興，士人之勤事。
韶華不再，學者惟當惜陰；
日月其除，志士正宜待旦。

統系

盤古首出御世，天地初分；
天皇淡泊無爲，干支始建。
地皇定三辰，以分晝夜；
人皇掌九區，以奠山川。
有巢構木爲巢，而民知居處；
燧人鑽木取火，而民知飲食。
伏羲畫八卦以開文教，作六書以代結繩，甲歷姓氏
人事漸繁；
神農樹五穀以資民生，嘗百草以療民疾，農事方
書，制度乃備。
粵惟有熊，啓自少典。
外治兵，內修德，開征誅弔伐之先；
明律歷，制冕裳，肇禮樂文章之祖。
得六相而天地治，畫九野而政教敷。
金天爲軒轅之子，顓頊乃黃帝之孫。
帝嚳之祖曰少昊，陶唐之父曰高辛。
聖聖傳流，賢賢繼統。
稱元建國，惟唐及虞。
仁如天，智如神，放勳之德，民無能名；
解民慍，阜民財，重華之德，人莫能及。
夏后家天下而代虞，受禪成功曰禹；
商王拯生民而伐夏，除暴去虐曰湯。
桀紂異世，同稱暴君；
文武相承，均推聖主。
卜世三十，卜年七百。
周過其歷而日衰，春秋五霸，戰國七雄，秦併其地
而漸促。
赤帝子誅白帝子，漢祖興劉；
假皇帝逼眞皇帝，新莽篡漢。
白水眞人，實開東漢；

中山帝胄，爰霸西川。
典午竊當塗之緒，金牛承石馬之宗。
五姓據中華而擾晉，六朝依江左而終陳。
元魏迅掃群邦，北伐齊而西授周；
宇文兼併高氏，得之元而失之楊。
隋帝弑父篡位，身喪國亡；
唐宗劫父稱兵，逆取順守。
惜夫牝后豔妃，亂之於中；
悲哉宦官方鎮，擾之於末。
紛紛五季，八姓十三君；
莽莽群雄，九州數十主。
若度德而度義，果孰是而孰非？
宋祖剪諸凶而獨秉乾綱，太宗承兄業而懋應大寶。
汴梁九帝，爲遼之兄，爲夏之父；
臨安九君，爲金之侄，爲元之俘。
徽、欽二宗，蒙塵於北；
益、廣二主，行遁於南。
有元起自北方，上世號爲蒙古。
自世祖之混一，迄順帝之淪亡，數幾百年，代凡十易。
太祖奮跡濠滁，實開南國；
燕王興師靖難，定鼎北平。
逮夫明季之頹靡，爰有思宗之殉烈。
儲君不能效靈武之跡，諸藩不能繼江表之蹤。
滿族入關，旗兵制勝。
有聖祖高宗之盛治，有教匪髮捻之奇氛。
曾左雖號中興，華洋漸開兵燹。
以攝政始，以攝政終，總是宮闈之失德。
由竊位興，由遜位發，未聞忠烈之捐軀。
十二帝歸結清廷，三百年略如明祚。
辛亥革命，民國肇興。

專制推翻，共和成立。

袁氏以稱帝而卽蹶，張勳欲復辟而未成。

軍閥跋扈飛揚，政客甚囂塵上。

全國統一，端賴北伐之成功；

舉世和平，庶遂大同之願望。

朝廷

三皇爲皇，五帝爲帝。
尙德者王，尙力者霸。
天子，萬邦之主；
諸侯，列國之君。
五帝官天下，以位讓賢；
三王家天下，以位傳子。
陛下天子之尊稱，殿下藩王之懿號。
新主登極曰龍飛，群臣覲君曰虎拜。
皇帝之言曰綸音，皇后之命曰懿旨。
椒房是后妃所居，楓宸乃君王所蒞。
天子尊崇，故稱元首；
臣鄰輔弼，故喻股肱。
麟之趾，龍之種，俱譽宗藩；
邦之貞，國之貳，皆稱太子。
建儲位，立青宮；
傳國寶，稱玉璽。
宗室之派，演於天潢；帝胄之譜，名爲玉牒。
前星耀彩，共祝千秋；
嵩嶽效靈，三呼萬歲。
聖主德配昊天，遂動華封之祝；
帝子覃恩少海，爰興樂府之歌。
尊帝父曰：太上逍遙；
頌國母曰：女中堯舜。
神器、大寶，皆言帝位；
淑妃、貴嬪，總是宮娥。
帝女乃公侯主婚，故有公主之稱；
帝婿非正駕之車，故有駙馬之職。
縣主、鄉君，侈言宗女之貴；
儀賓、郡馬，艷稱戚里之榮。
試觀人世繁華，誰似皇家富貴？

相猷

有道之世，元首明而股肱良；
盛德之君，輔弼周而疑丞備。
燧人四佐，結繩之政聿興；
黃帝六相，垂裳之化乃著。
五臣佐舜，而懷襄之害消；
十亂興周，而弔伐之功遂。
聘伊尹於莘野，除暴救民；
求傳說於巖阿，中興致治。
周公、召公，夾輔王朝；
吉甫、方叔，並爲元老。
管、晏建霸顯之勛，僑、肸推邦家之選。
蕭、曹以連（運）籌匡贊，開炎漢之先；
房、杜以碩畫訂謨，啓盛唐之業。
武侯輔漢於蜀，梁公反周爲唐，是旋乾轉坤之手；
汾陽恢復二京，西平重安九廟，洵補天浴日之功。
姚、宋同心輔政，故開元之治，比於貞觀；
趙、張戮力匡君，故紹興之治，幾於元佑（祐）。
尚文尚儉，唐有張燕公、杜魏侯；
大忠大雅，宋有寇忠愍、王文正。
申屠嘉之與王商，想西京之威重；
謝安石之與王導，具江左之風流。
石廣（慶）數馬，寅畏小心，丙吉問牛，調燮大體；
公孫弘以儒術佐漢，李衛公以謀略興唐。
一清一寧，王戎簡要而能言；
十漸十思，魏徵嫵媚而善諫。
安用三寸毛錐，桑維翰指麾定亂；
只須半部論語，趙韓王經濟守城。
李沆持衡，貴戚不夤緣而拜台席；
司馬秉軸，遼人戒生事以擾邊疆。

至於父子登庸，則伊尹之子伊陟，巫咸之子巫賢，
韋賢之子韋玄成，李吉甫之子李德裕；
兄弟濟美，則王祥之弟王覽，卞粹之弟卞純，崔陵
之弟崔仲文，曾布之弟曾肇。
三世爲相，則張嘉貞之若子若孫也，呂公著之乃祖
乃父也；
四世爲相，則弘農之有楊震也，汝南之有袁安也。
一十二、二十四，秦甘羅、漢鄧禹，何其少也；
八十二、九十一，張柬之、文彥博，不亦晚乎？
四朝元宰，裴晉公莫與京焉；
長樂老敘，馮可道何足觀也。

文階

聖主有出震向離之象，大臣有扶天捧日之功。

公孤位比三台，郎官序應列宿。

宰相爵居鼎鉉，選曹職掌銓衡。

曰天官，曰地官，曰春官，曰夏官，曰秋官，曰冬官，六部察采之通稱；

曰冢宰，曰司徒，曰宗伯，曰司馬，曰司寇，曰司空，尚書侍郎之總號。

柏府、烏臺，推崇都憲；

鳳池、薇省，贊美詞林。

皇華以譽行人，司成以尊祭酒。

內而科道，總稱柱後惠文；

外而督撫，並號中丞開府。

方伯、藩侯，布政參議之職；

臬司、廉憲，提刑按察之名。

學政號曰文衡，鹽法稱爲鹺憲。

郡侯、刺史，太守名尊；

別駕、治中，府寮望重。

州牧、邑長，乃知州、知縣之號；

貳尹、少府，卽縣丞、縣尉之稱。

仕宦俗號鄉紳，農官古稱田畯。

鈞座、台座，皆推顯宦；

憲轅虎幄，並譽尊僚。

初官曰筮仕，蒞任曰下車；

任滿曰及瓜，歸田曰解組。

秩官旣分九品，命婦亦有七階。

婦人受封曰金花誥，中書詔敕曰紫泥封。

唐帝以金甌覆宰相之名，宋主以美珠箝諫臣之口。

金馬玉堂，群羨翰林聲價，朱幡皂蓋，爭看郡守威儀。

八座皆紫閣明公，五馬卽黃堂太守。

代天巡狩，直指通稱；
指日高升，官僚美譽。
藩垣屏翰，有侯伯之尊；
墨綬銅章，乃子男之列。
太監掌宮門之禁令，故曰闔宦；
朝臣皆摺笏於紳間，故曰摺紳。
樹愛甘棠，召伯化行於南國；
碑名墮淚，羊公澤被於襄陽。
魚頭贊魯直之丰稜，伴食嘲盧相之緘默。
王德用稱黑王相公，趙清獻號鐵面御史。
劉守愛民，蒲鞭示辱；
羊君潔己，官署懸魚。
直言不諱，何殊鳴鳳朝陽；
彈劾無私，未許豺狼當道。
鄧侯政美，挽之不留；
謝令性貪，推之不去。
蜀郡民歌五袴，漁陽麥秀兩歧。
魯恭三異，中牟桑下有雉馴；
郭伋重來，并境兒童迎竹馬。
鮮于乃一路福星；
司馬是萬家生佛。
鸞鳳不棲枳棘，主簿快睹仇香；
河陽遍種桃花，縣令欣逢潘岳。
劉昆宰江陵，反風滅火；
龔遂守渤海，賣劍買牛。
皆由德政可稱，是以令名攸著。

武秩

韓、柳、歐、蘇，固文人之最著；
起、翦、頗、牧，更武將之多才。
小范老子，腹中數萬甲兵；
西楚霸王，江東八千子弟。
孫武、吳起，方略堪誇；
司馬、尉繚，機權莫測。
尚父六韜，有文、武、龍、虎、豹、犬之別；
石公三略，有上略、中略、下略之分。
搜、苗、獮、狩，四時以簡車徒；
虎、貔、熊、羆，三軍以張威武。
開府、元戎，卽都督、總兵之號；
參戎、都閫，卽參將、都司之稱。
遊擊、守備，有游戎、鎮撫之名；
守禦、把總，有千侯、百宰之譽。
以車相向曰轅門，顯揭戰功曰露布。
刻日交鋒曰對壘，議和釋怨曰行成。
戰勝班師曰凱旋，戰敗奔走曰追北。
爲君泄憤曰敵愾，爲國紓難曰勤王。
獨立大樹下，馮將軍不炫戰功；
勞軍細柳營，漢文帝方知將略。
庸王侈言兵眾，投鞭可以斷流；
英流自薦才奇，處囊便當脫穎。
國士無變，受辱於胯下；
孺子可教，進履於圯橋。
穩跡爲牧豕奴，卒膺長平之秩；
降身爲屠狗輩，竟啓舞陽之封。
求士莫求全，毋以二卵捐勇將；
用人如用木，勿以寸朽棄良材。
總之君子之身，可大可小；
丈夫之志，能屈能伸。

寧學淮陰之將兵，多多益善；
毋爲平原之從者，碌碌無奇。
自古英雄，難以枚舉；
欲知兵略，須諳韜鈴。

將略

治世以文，弼亮之臣攸賴；
勘亂以武，熊罷之士宜先。
起、翦、頗、牧、秦趙之干城；
衛、霍、英、彭，炎劉之上將。
太公黃鉞白旄以董六師，武侯葛巾羽扇而臨大敵，
將在謀而不在勇。
曹公渡江八十萬，敗於周瑜；
先主連營七百里，破於陸遜，兵在精而不在多。
熾牛尾以衝燕，竊虎符而救趙，爲轟雷掣電之師。
雅歌投壺以臨戎，輕裘緩帶而拒敵，乃鎮靜雍容之將。
韓信囊沙以破楚；
鄧艾逾崖以襲蜀；
孫臏收滅竈之功；
馬援定聚米之策，此多算而勝之驗也。
飛將軍一見而魂銷；
真天威七擒而心服；
郝玘怖小兒之啼；
石虔愈病夫之瘡，此威名素著之徵也。
至於濟河焚舟，誓死不回而報晉；
臥薪嘗膽，深謀積慮以平吳。
鳴琴擁篲，無兵而示以莫測；
唱籌量沙，不足而見其有餘。
班定遠三十六人，收西域五十餘國，不費斗粟以成功，實建不世之業；
曹武惠二十萬眾，下江南四十餘州，不殺一人而定國，乃稱王者之師。
是以信陵歸魏，強秦不敢加兵；
樂毅去燕，全齊得而復失。
每覘俊傑之行藏，可卜邦家之貞悔。

父子

何謂五倫？

君臣、父子、夫婦、兄弟、朋友；

何謂九族？

高、曾、祖、考、兄弟、子、孫、曾、玄。

始祖尊爲鼻祖，遠孫號曰耳孫。

父子相繼，肯構肯堂；

作述俱賢，是橋是梓。

祖稱王父，父曰嚴君。

父母康寧，比椿萱之並茂；

子孫發達，似蘭玉之聯芳。

不癡不聾，不作阿家翁；

得親順親，方可爲人子。

孝養祖母，李密陳情；

尊奉家公，侯霸垂訓。

蓋前愆，名爲幹蠱；

育義子，乃曰螟蛉。

生子當如孫仲謀，曹公嘆美之語；

生子須如李亞子，梁主羨慕之詞。

菽水承歡，貧士養親之樂；

義方立教，賢父愛子之心。

紹我箕裘，克昌厥後；

續我祖考，無忝所生。

具慶下，表父母俱存；

重慶下，謂祖孫相繼。

詒厥孫謀，乃稱燕翼；

繩其祖武，是謂象賢。

家有令子，慶麟趾之呈祥；

室有佳兒，羨鳳毛之濟美。

王右軍分甘自娛，郭汾陽問安惟頷。

和丸教子，仲郢母賢；

戲彩娛親，老萊子孝。
毛義捧檄而喜，感親之在；
伯俞被笞而泣，痛母之衰。
慈母望子，倚門倚閭；
遊子思親，陟岵陟屺。
家督斯堪主器，門子乃能克家。
父期其子曰充閭，子勝其父曰跨竈。
寧馨、英物，無非羨彼之兒；
國器、掌珠，悉是譽人之子。
可愛者子孫之多，若螽斯之揖揖；
堪誇者嗣續之盛，如瓜瓞之綿綿。

兄弟

天下無不是底父母，世間最難得者兄弟。
須貽同氣之光，無傷一本之誼。
玉昆金友，羨兄弟之俱賢；
伯壘仲箴，喻聲氣之相應。
兄弟旣翕，花萼相輝；
孟季齊芳，棣華競秀。
患難相顧，似鵲鴿之在原；
手足分離，如雁行之折翼。
元方、季方俱盛德，難兄難弟；
景文、元憲共登科，大宋小宋。
潁州八龍著譽，河東三鳳馳名。
賈門三虎，偉節獨優；
馬氏五常，白眉爲最。
八元、八愷，希世之才；
雙璧、雙珠，曠代之勝。
征東破斧，周公大義滅親；
遇賊爭先，趙孝輕生代弟。
煮豆燃萁，諷其相害；
斗粟尺布，譏其不容。
變起鬪牆，尙堪禦侮；
天生羽翼，自是同仇。
姜家製被以同眠，宋帝灼艾以分痛。
田氏分財，忽悴庭前之樹；
孤竹讓國，共甘首陽之薇。
雖曰不如友生，亦云莫如兄弟。

叔侄

至於世父、諸父，皆伯叔之稱；
若夫猶子、從子，乃諸侄之謂。
家有名士，王濟諱言叔癡；
阿大中郎，道韞雅推叔美。
名以鎮惡，王猛知孫之非常；
譽以龍文，楊昱誇弟之特異。
烏衣郎，稱王謝之子弟；
千里駒，羨苻朗爲可兒。
竹林盃酒，阮家叔侄之狂；
玉樹芝蘭，謝氏門庭之盛。
存侄棄子，悲伯道之無後；
事叔如父，羨仲郢之居官。
盧邁無兒，以侄主身之後；
張范（範）遇賊，以子代侄而生。
百犬同牢，陳氏義門獨著；
九族均賚，范公高誼無倫。
非遵象山之三聽，焉能亢宗；
必師公藝之百忍，斯堪裕後。

夫婦

孤陰則不生，獨陽則不長，陰陽和而後雨澤降；
男以女爲室，女以男爲家，夫婦和而後家道成。

夫謂妻，曰內子，曰細君，妻稱夫，曰良人。

受室自言娶妻，納寵謂人買妾。

賀人成婚曰偕伉儷，稱人納妾曰如夫人。

結髮係是初婚，續弦乃爲再娶。

婦人重婚曰再醮，男子無偶曰鰥居。

如鼓瑟琴，好合之謂；

琴瑟不葉，反目之稱。

牝雞司晨，比婦人之預事；

河東獅吼，譏丈夫之畏妻。

蒸梨出妻，曾子善全孝道；

殺妻求將，吳起何其忍心。

張敞畫眉，兒女之態可哂；

董氏封髮，貞潔之性堪誇。

冀缺夫婦，相待如賓；

仲子夫婦，自食其力。

糟糠不棄，宋弘可謂義夫；

眉案相莊，梁鴻喜得賢婦。

樂昌破鏡之分，蘇蕙回文之織，悵矣生離；

張瞻炊臼之夢，莊子鼓盆之歌，悲哉死別。

鮑宣之妻提甕出汲，內助斯賢；

陶潛婦同志耕鋤，隱德最著。

可怪者買臣之妻，家貧求去，不思覆水難收；

可醜者，相如之婦，夤夜私奔，但識絲桐有意。

要知身脩而後家齊，必也夫義自然婦順。

師友

宣聖杏壇，弟子三千，而賢人七十，馬君絳帳，後列女樂，而前授生徒。

設教有如振鐸，待問何異叩鐘。

賈氏舌耕，後人謙爲糊口；

孔門心服，諸生賴以折衷。

師號西賓，尊師席曰函丈；

學名家塾，饋學俸曰束修。

門牆桃李，謂受業之眾多；

苜蓿闌干，言供膳之菲薄。

冰生於水而寒於水，比後進之過於先生；

青出於藍而勝於藍，喻弟子之優於師傅。

未穫及門，曰宮牆外望；

已承秘授，曰衣鉢真傳。

楊震是關西夫子，賀循乃當世儒宗。

負笈爲千里游，李固就師之篤；

程門立三尺雪，游楊敬學之誠。

稱師善教，如坐春風之中；

感業有成，得沾時雨之化。

師嚴乃道尊，甄陶必資模範；

友良斯德備，攻玉端藉他山。

取善輔仁，貴於益友；

往來交際，爰有嘉賓。

爾我同心，似金蘭之最摯；

友朋合志，可麗澤以相滋。

先世通家，尊爲父執；

平生齊契，號曰同袍。

行合趣同，乃云莫逆；

披衿領契，是謂忘形。

廉藺爲刎頸之交，孫周原總角之好。

膠漆雖堅，不若雷陳之誼合；

雞黍有約，應知張范之情通。
王陽在位，貢禹因以彈冠；
杜伯遭刑，左儒不辭死諫。
信乎同人於野，如襲芝蘭之香；
倘若比之匪人，如染鮑魚之臭。
肝膽相托，是謂心期；
意氣不孚，無非面友。
始終如一曰耐久，老幼相得曰忘年。果能如水以全
交，須融冰炭；
勿以乾餱之失德，遂致參商。
落月屋梁，相思顏色；
暮雲春樹，企望丰標。
陸士和折梅逢使，聊寄江南一枝春；
王摩詰攀柳贈行，快唱陽關三疊曲。
班荊傾蓋，途遇交歡；
操篲掃門，迓迎致敬。
頻來無忌，居然入幕之賓；
不請自來，洵是不速之客。
敘別則曰分袂，締交則曰盍簪。
設醴不常，楚王禮賢之意怠；
投轄無厭，陳公留客之心殷。
中郎倒屣以迎賓，大聖握髮以待士。
府尹重徐生之德，下榻爲歡；
延陵遇子產之賢，縞紵相贈。
絕絃傷友，爲乏知音；
割席拒朋，謂非同志。
分金多與，獨知管仲之貧；
遇故贈袍，深憐范叔之困。
賓主情聯，須盡東南之美；
友朋義合，共期惓切之誠。

婚姻

良緣必由夙締，佳耦本是天成。
蹇修、執柯，媒妁之號；
冰人、掌判，傳語之人。
婚姻須六禮之周，嫁娶合二姓之好。
女嫁曰于歸，男婚曰有室。
新婦謁祖曰廟見，女子省親曰歸寧。
問名納采，葉陳敬仲之鳳占；
嫁女婚男，畢向子平之素願。
成親有日，預訂星期；
傳命而來，全憑月老。
委禽納幣，聘禮孔嘉；
合卺交杯，新婚宴爾。
侍巾櫛，奉箕帚，嫁女謙詞；
嫺姆訓，習閨儀，相夫賢德。
綠影垂窗，憫貧家之女；
紅樓夾道，誇富室之姝。
桃之華，曰夭夭，曰灼灼，謂婚禮之及時；
標有梅，其實七，其實三，謂吉期之已過。
御溝流葉，洵是良媒；
繡幕牽絲，方爲快婿。
宮中論婦，願得金屋以貯嬌；
月下言婚，方知赤繩之繫足。
朱陳一村而結好，秦晉兩國以聯姻。
藍田種玉，雍伯之良緣；
孔雀射屏，唐皇之盛事。
故禮先親迎，所以端人倫之始；
詩始好逑，正以崇王化之原。

列女

男稟乾體之剛，女配坤德之順。
賢后稱女中堯舜，健婦爲女中丈夫。
曰閨秀，曰淑媛，皆稱賢女；
曰楚娃，曰宋豔，並號佳人。
婦主中饋，足徵內助之賢；
妻念蒿砧，斯葉女貞之吉。
何謂三從，從父從夫，夫死從子；
何謂四德，婦德婦容，婦言婦功。
姬氏母儀訓世，有周姜，有太妊，有太姒；
三代女寵喪邦，以妹喜，以妲己，以褒姒。
蘭質蕙心，名姝之美譽；
柏操霜節，嫠婦之清聲。
女貌娉婷，謂之尤物；
婦容婉媚，實可傾城。
潘妃步朵朵蓮花，小蠻腰纖纖楊柳。
玄妻髮光可鑑，絳仙秀色可餐。
麗娟氣馥如蘭，呵成香霧；
楊妃淚紅如血，點滴堅冰。
詩傳柳絮，信道韞之才高；
裙號留仙，美飛燕之善舞。
至若緹縈之上書救父，盧氏之冒刃衛姑，此女之孝者。
陶母之截髮留賓，絡秀之具饌供客，此女之賢者。
韓女之投身於穢，陳婦之殞軀於崖，此女之烈者。
李氏之引斧斷臂，曹女之引刀割鼻，此女之節者。
大家之續成漢史，文姬之謄寫賜書，此女之才者。
荀灌之突圍求救，木蘭之代父從軍，此女之勇者。
戴女之練裳竹笥，孟光之荊釵布裙，此女之貧者。
任妻之禿豔妃髮，劉婦之怒洛陽賦，此女之妒者。
賈午之私贈異香，文君之夜奔邸舍，此女之蕩者。

東施之效顰可厭，無鹽之刻畫難堪，此女之醜者。
自古貞淫各別，人生妍醜不同，莫因許婦之乏容，
遂效蕭郎之遠逝。

外戚

論婚姻固推尹媼，言懿戚更屬潘楊。
冰清玉潤，同時翁媪皆賢，泰水泰山，外氏舅姑並重。

新媪曰嬌客，贅媪曰館甥。

坦腹東牀，執半子之禮；

乘龍華閥，誇百兩之將。

女子號門楣，貴妃榮施於父族；

外甥稱宅相，魏舒期報於母家。

敘舊曰原有瓜葛之親，自謙曰忝在葭莩之末。

稱姑子爲外家之寶，尊舅氏爲渭陽之情。

大喬小喬，有雙美之譽；

連襟連袂，皆僚媪之稱。

蒹葭依玉，敢分戚屬之光；

蔦蘿附松，全仗懿親之庇。

年齒

不凡之子，必異其生；
大德之人，必得其壽。
生申初度，賀人壽誕之稱；
遐算修齡，祝人壽考之謂。
洗三曰湯餅之會，試周曰晬盤之期。
男誕曰顯弧令旦，女誕曰設帨良辰。
賀人生子，嵩嶽降神；
自謙生女，緩急非益。
曰夢熊，曰弄璋，生男之兆；
曰夢虺，曰弄瓦，生女之徵。
姜嫄履巨迹而娠，簡狄吞鮪卵而孕。
鄭姬芳蘭叶吉夢，桓公英物試啼聲。
麟吐玉書，天啓尼山聖瑞；
燕投懷內，夢徵唐室人豪。
李老君八十年而降，道號猶龍；
漢太子十四月而生，門名堯母。
晚年得子，老蚌生珠；
皓首登科，龍頭有屬。
賀男壽曰南極星輝，賀女壽曰中天婺彩。
松筠節操，羨風霜耐久；
桑榆暮景，慮歲月之無多。
矍鑠人稱強健，老朽自謙衰頹。
黃髮、兒齒，眉壽之徵；
潦倒、龍鍾，暮年之狀，日月其邁，徒自傷悲；
青春幾何，問人壽算。
行年五十，當知四十九年之非；
在世百歲，那有三萬六千之樂。
故有上、中、下壽之分，更有耄、耄、期頤之號。
自就傅而舞勺舞象，固可畏之後生；
由杖鄉而杖國杖朝，尤當敬其老者。

身體

百體惟血肉之軀，五官有貴賤之別。
帝堯眉分八采，大舜目有重瞳，神禹之耳三漏，成湯之臂四肘。

周文王龍顏而虎眉，漢高祖斗胸而隆準。
倉帝*之胸四乳，孔聖之頂若圩。（文王四乳）

姬公反握，作相於周；
重耳駢脅，興霸於晉。
此皆古聖之英姿，洵是不凡之貴品。

至若髮膚不敢毀傷，守身爲大；
待人須當巽順，唾面自乾。
讒言誹謗，金可鑠而骨可銷；
虐政誅求，敲其膚而吸其髓。

受人牽制曰掣肘，不知羞愧曰厚顏。
共話衷曲曰談心，擅生是非曰鼓舌。
怒髮衝冠，蘭生之英氣勃勃；
炙手可熱，崔氏之貴勢炎炎。
民肥君瘦，唐宗盛德可嘉。
口蜜腹刀，李相奸邪最著。

趙子龍一身是膽，周靈王生而有髭。
注醋囚鼻，酷吏肆威；
加足帝腹，客星犯座。

久不屈茲膝，強鎮自爾寒心；
不爲米折腰，高士幡然歸隱。
纖指有如春筍，媚眼正似秋波。

肩聳玉樓，目澄銀海；
淚垂玉箸，額表珠庭。
歇擔謂之息肩，不服謂之強項。

丁謂爲人拂鬚，何其諂也；
彭樂截腸決戰，不亦勇乎？
剜肉醫瘡，權濟目前之厄；

傷胸捫足，計安眾士之心。
張子房躡足附耳，黃眉翁洗髓伐毛。
契丹避黑面大王，東坡頌鐵肝御史。
土木形骸，容無藻飾；
心腸鐵石，性本堅剛。
會晤曰得挹芝眉，邀請曰敢攀玉趾。
侏儒，誚人短小；
魁梧，譽人英奇。
龍章鳳姿，廊廟之彥；
獐頭鼠目，草野之夫。
恐懼則畏首畏尾，感佩則刻骨銘心。
貌醜曰不揚，貌美曰冠玉，耳聾曰重聽，足跛曰蹠
跚。
期期艾艾，口訥之稱；
捷捷幡幡，贊言之謂。
可羨者小心翼翼，可鄙者讒口囂囂。
腰細謂之柳腰，身小謂之雞肋。
笑人缺齒，狗竇胡爲大開；
謂人疑心，首鼠從茲僨事。
胸中冰炭，言人事之參差；
皮裏陽秋，謂一心之褒貶。
唇亡齒寒，相依表裏；
足上首下，倒置親尊卑。
所爲得意，果然吐氣揚眉；
待人以誠，恍若推心置腹。
忙迫則方寸已亂，沉醉則玉山將頹。
睡曰黑甜，臥曰息偃。
童蒙乳臭，謂年少之無知；
折臂折肱，謂醫家之老練。
西子捧心而愈媚，楊妃露乳而增妍。
肉眼不識英賢，青睛自然聰慧。

脅肩無非媚態，諂笑何異奴顏。
義士丹心，期於報國；
婦人長舌，實爲厲階。
事之遂心曰如願，事之可愧曰腆顏。
人之多言者曰饒舌，物之堪食者曰可口。
澤及枯骨，頌其仁慈；
包藏禍心，戒其奸慝。
賢君療臣之病，親剪其鬚；
忠臣罵賊不屈，被斷其舌。
不較橫逆，曰置之度外；
洞悉情形，曰已在目中。
口有雌黃，王夷甫善談玄理；
眼分青白，阮嗣宗厚待嘉賓。
擲果盈車，因豐姿之可愛；
投石滿載，爲醜陋之堪憎。
事之可怪者，婦女生鬚；
世所駭聞者，丈夫孕子。
燃眉之急，求人之相助；
噬臍何及，悔事之無成。
肥瘠漠不相關，秦人之視越；
頭皮這回斷送，楊婦之送夫。
無功食祿，謂之尸位素餐；
譴劣無能，謂之行屍走肉。
一息尙存，此志不容少懈；
十手所指，吾心安可自欺。

衣飾

冠爲元服，衣是身章。

曰冕曰弁，皆冠之號；

曰舄曰屣，俱履之名。

士人初冠有三加，上公命服有九錫。

簪纓黼黻，仕宦之榮；

縫掖章甫，貧儒之飾。

布衣卽白丁之謂，青衿乃士子之稱。

葛屨履霜，誚儉嗇之過甚；

綠衣黃裏，譏貴賤之失倫。

上服曰衣，下服曰裳；

衣前曰襟，衣後曰裾。

華服曰綺紈，敝衣曰藍縷，兒衣曰襁褓，童飾曰弁髦。

不序尊卑，如以冠苴履；

不歸鄉里，如衣錦夜行。

狐裘三十年，儉推晏子；

錦幃五十里，富羨石崇。

春申君珠履三千，牛丞相金釵十二。

千金之裘，非一狐之腋；

羅綺之輩，豈養蠶之人。

貴者重裊迭褥，貧者短褐不完。

公孫布被十年，子夏鶉衣百結。

京洛化淄衣，騷人琢句；

山門留玉帶，學士參禪。

鷓鴣裘，白鶴氅，名士風流；

忍辱鎧，無垢衣，空門寂寞。

三河領袖，誇裴駿之超群；

南州冠冕，譽龐統之邁眾。

聖主制衣裳，以命有德；

賢君藏敝袴，以待有功。

晉侯衣不重裘，唐宗服經三浣。
衣履不敝，不肯更爲，世稱其儉；
衣不經新，何由得故，人服其廉。
姜氏可風，兄弟每宵同大被；
王章未遇，夫妻相對泣牛衣。
羊叔子緩帶輕裘，江東儒將；
陶淵明葛巾野服，陸地神仙。
故曰服之不衷，身之災也；
亦云敝而無憾，志獨超歟。

人事

大學首重明新，小子先嫻應對。
修容固宜合度，出言尤貴有章。
智欲圓而行欲方，膽欲大而心欲小。
執事足下，稱人之詞；
不佞鮒生，自謙之語。
恕罪曰寬宥，惶恐曰主臣。
翰撰春元、鄉會之稱不一；
貶封碩望，仕隱之譽多殊。
大掾史贊美吏員；
大柱石尊崇官宦。
賀入泮曰雲程發軔，賀新冠曰元服始加。
仕途榮歸，謂之錦旋；
經商獲財，謂之稊載。
送禮曰獻芹，辭饋曰反璧。
謝人曰厚貺，自謙曰菲儀。
餞行之禮，謂之贐儀；
拜見之貲，謂之贄敬。
賀壽曰祝敬，弔喪曰奠儀。
接風曰洗塵，送行曰祖道。
犒勞僕夫，謂之旌使；
開筵演劇，謂之優觴。
答人寄書，曰辱承華翰；
謝人致問，曰多蒙寄聲。
索人回信，曰早賜玉音；
謝人許物，曰已蒙金諾。
具柬曰投刺；
啓函曰開緘。
思念之久，素切瞻韓，想望之殷，夙懷慕藺。
相與未深，才才有半面之識；
不期而遇，實乃邂逅之緣。

登龍門謂參名士；
瞻山斗謂仰高賢。
相思則一日三秋，不遇則渴塵萬斛。
睽違已久，未免鄙吝復萌；
來往無憑，有似飄萍靡定。
虞帝慕聖，見於羹，見於牆；
顏子從師，趨亦趨，步亦步。
曾經晤語，向荷承顏接辭；
偶獲談心，幸蒙耳提面命。
吹噓乃資其汲引，包荒是冀其含容。
求人薦引，曰幸爲先容；
求人改文，曰懇賜郢斫。
借重鼎言，邀人議事；
乞移玉趾，浼人親行。
多蒙推轂，謝人引進之辭；
望爲領袖，託人倡首之說。
鄉評推爲月旦，良友穆若金蘭。
逢人說項，志在表揚；
名下無虛，方能好古。
黨惡爲非曰朋奸，盡財以博曰孤注。
徒了事曰但求塞責，戒明察曰不必苛求。
方命是逆人之言，執拗是任己之性。
曰覬覦，曰睥睨，總謂私心窺探；
曰倥傯，曰旁午，皆言人事紛紜。
小過必察，比之吹毛求疵；
乘患相攻，甚於落井下石。
欲心難厭如溪壑，財物易去如漏卮。
頓開茅塞，感人之教益；
深蒙藥石，謝人之箴規。
清修、芳躅，皆懿行之可師；
確論、美談，悉嘉言之可頌。

謹飭謂之緘默，息怒謂之霽威。
包公寡色笑，人比黃河之清；
阮子鮮許可，誰蒙青眼之顧。
仇深曰切齒，交好曰知心。
大笑曰解頤，微笑曰莞爾。
撫掌則聞言絕倒，掩口則對客胡盧。
向隅則一人獨悲，哄堂則三院皆笑。
上座延賓，謂之虛左；
官僚共署，謂之同寅。
失信曰爽約，又曰食言；
背誓曰寒盟，又曰反汗。
銘心鏤骨，佩德難忘；
結草銜環，知恩必報。
自惹其滅，有如解衣抱烈火；
幸免其害，何異漏網就深淵。
兩不相入，謂之枘鑿；
兩不相投，謂之冰炭。
彼此不合曰齟齬，進退維谷曰趑趄。
落落乃不合之辭，區區亦自謙之語。
竣者，作事已畢之謂；
釀者，斂財會飲之名。
贊襄謂之玉成，分裂謂之瓦解。
事有低昂曰軒輊，力相上下曰頡頏。
憑空起事曰作俑，仍前踵弊曰效尤。
不辭勞苦曰拮据，不暇修飾曰鞅掌。
手足並行曰匍匐，俯首沉吟曰低徊。
明珠投暗，大屈才能；
入室操戈，自相殘害。
求教於愚者，是謂問道於盲；
枉道以干人，是謂銜玉求售。
智謀之士，所見略同；

仁人之言，其利甚溥。
班門弄斧，不知分量；
岑樓齊末，不識高卑。
勢延莫遏，比之滋蔓難圖；
包藏禍心，謂其人心叵測。
道旁作舍，議論多而難成；
一國三公，權柄分而靡適。
遇合奇緣，曰三生有幸；
事多逆境，曰一事無成。
酒色是耽，如以雙斧代孤樹；
才力不及，如以寸膠理黃河。
「兼聽則明，偏聽則暗」，此魏徵之對太宗；
「眾怒難犯，專欲難成」，此子產之諷子孔。
欲逞所長，不覺心煩技癢；
絕無所好，等於槁木死灰。
座上有南客，切須謹言；
往來無白丁，乃爲取友。
知遇之來，漸入佳境；
倨傲之甚，旁若無人。
借事寬役曰告假，用財囑託曰夤緣。
事有大利，曰奇貨可居；
事宜鑑前，曰覆車可戒。
事分彼此，曰左袒；
事持兩可，曰模稜；
敵甚易摧，曰發蒙振落，志在必勝，曰破釜沉舟。
曲突徙薪無恩澤，不念豫防之力；
焦頭爛額爲上客，徒知拯救之勞。
竊盜曰梁上君子，強梗曰化外頑民。
竹頭木屑，皆爲有用之物；
牛溲馬勃，可備藥籠之資。
五經掃地，自褻斯文；

一木撐天，可消逆志。
題鳳書午，譏諂之隱詞；
破麥剖梨，會合之奇夢。
毛遂片言九鼎，君嘆其賢；
季布一諾千金，人服其信。
志士盡忠報國，大儒清白傳家。
下強上弱，曰尾大不掉；
此權彼操，曰太阿倒持。
爲人幹辦曰代庖，爲人設謀曰借箸。
見事極真，明若觀火；
對敵易勝，勢若摧枯。
生平可對人言，溫公自信之語；
運用存乎一心，武穆論兵之機。
不修邊幅，謂人之坦率；
不立崖岸，謂人之和易。
蕞爾么么，言其甚小；
鹵莽滅裂，言其不精。
誤處皆緣不學，習慣乃成自然。
過於欲速曰躐等，過於禮貌曰足恭。
鄉愿爲（疑僞之訛）學之稱，巨擘出群之譽。
孟浪多由輕薄，暇豫每事精詳。
爲善者流芳百世，爲惡者遺臭萬年。
過多曰稔惡，罪滿曰貫盈。
冶容固可誨淫，慢藏亦能誨盜。
管中窺豹，所見無多；
坐井觀天，其識未廣。
無勢可乘，英雄無用武之地；
有道則見，君子展濟世之才。
稱人利達，曰捷足先得；
慰士遲滯，曰大器晚成。
不知合變，徒讀父書；

自作聰明，徒執己見。
淺識謂之膚見，俗語謂之俚言。
明哲不昧先幾，俊傑能識時務。
愚者豈無一得，武人不識一丁。
戒輕敵曰勿謂秦無人。
戒輕言曰恐屬垣有耳。
助桀爲虐；
謂同惡之相濟；
得隴望蜀。
謂求利之無厭。
須知器滿必傾，每見物極則反。
嬉戲名爲好弄，嘲笑卽是詼諧。
讒口交加，市中有虎；
群姦煽惑，聚蚊成雷。
萋斐成錦，喻奸徒之釀禍；
含沙射影，言鬼蜮之害人。
針砭所以治病；
鳩毒必致殺人。
陰柔害物，笑裏藏刀；
詭譎諂人，腹中有劍。
拔去一丁，謂除一害；
又生一秦，是增一仇。
從來淑慝殊途，惟在後人法戒；
欺世情濁異品，全賴吾輩激揚。

飲食

甘脆肥膿，無非腐腸之藥物；
羹藜含糗，難語太牢之滋味。
盛饌曰珍饈，御膳曰玉食。
美酒曰青州從事，惡酒曰平原督郵。
雲液香醪，皆爲酒號；
龍團雀舌，俱是茶名。
待客禮衰，曰醴酒不設；
款賓意薄，曰脫粟相留。
竹葉青，眞珠紅，總爲旨酒；
鴨頭綠，鵝兒黃，悉是醇醪。
日給三升，東皋子之愛酒；
風生七碗，玉川子之嗜茶。
茶曰先春，又曰瑞草；
米曰白粲，又曰長腰。
待客驚雷莢，供佛紫茸香，溜流清況；
呼爲釣詩鉤，亦號掃愁帚，騷客閒情。
太羹玄酒，亦可薦馨香；
塵飯塗羹，奚能充飢餓。
酒係杜康所造，腐乃淮南所爲。
魚號爲水梭花，雞呼爲穿籬菜。
羔酒呼烏，田家自勞，含哺鼓腹，盛世民風。
貪食之人曰徒舖啜；
不敬之食曰嗟來食。
多食不厭，是爲饕餮之徒；
見食垂涎，似有欲炙之色。
謂人賜食曰飽德，謂人醒酒曰解醒。
半菽不飽，言飲食之艱；
每飯不忘，言思念之切。
謝人曰擾兵廚，自謙曰設魯酒。
白飯青芻，接待僕馬之厚；

炊金爨玉，款留賓客之豐。
貧家待客，何妨抹月披風；
冬月邀賓，亦可敲冰煮茗。
宰肉甚均，陳平見重；
戛羹示盡，丘嫂心憎。
晉人爲吏部而盜酒，逸興太豪；
良將愛士卒而投醪，戰氣百倍。
懲羹吹齋，謂人鑑前警後；
酒囊飯袋，謂人少學多餐。
隱逸之士，漱石而枕流；
沉湎之夫，藉糟而枕麴。
昏庸如桀紂，胡爲乎酒池肉林；
苦學若希文，正不妨斷齋畫粥。

宮室

洪荒之世，野處穴居；
以避毒害；
有巢以後，上棟下宇，以奠民生。
竹苞松茂，洵制度之得宜；
鳥革翬飛，亦創建之盡善。
前殿謂之紫宸，禁門謂之青瑣；
宰相職居黃閣，百官奏對丹墀。
木天署，學士所居；
紫薇閣，中書所蒞。
金馬玉堂，翰林清貴；
柏臺烏府，御史威嚴。
布政稱爲藩府，按察係是臬司。
安仁之令河陽，人稱花縣；
子賤之治單父，世號琴堂。
朱門、潭府，仕宦之家；
白屋、衡門，隱逸之宅。
喜氣遙臨，門蘭藹瑞；
高車過訪，蓬華生輝。
書言肯構肯堂，禮稱美輪美奐。
土木方興曰經始，創造已畢曰落成。
樓高可以摘星，室小僅堪容膝。
寇公庭外，只可栽花；
李相廳前，僅容旋馬。
稱人曰燕賀，自謙曰蝸居。
民家曰閭閻，貴族稱閥閱。
朝廷曰魏闕，書館曰芸窗。
館驛曰郵亭，客邸曰逆旅。
成均、辟雍，皆國學之號；
黌宮、庠序；
乃鄉學之名。

規制崇隆，四香分閣；
文章妙麗，五鳳名樓。
善忌者比之徒宅忘妻；
不謹者比之開門揖盜。
何樓多市偽之物，壟斷卽專利之人。
華門圭竇，貧士之居；
甕牖繩樞，寡人之室。
必若寇萊公，真是北門鎖鑰；
倘非檀道濟，誰爲萬里長城。

器用

凡一人之所需，必百工斯爲備。
雖則各適其用，而亦每異其名。
管城子，中書君，筆號不一；
石虛中、卽墨侯，硯名亦殊。
墨爲松使者，紙號楮先生。
銀光、玉版，俱是紙名；
九子、險麋，皆爲墨號。
金管、銀管、斑管，筆牀自分三品；
活眼、淚眼、死眼，硯石可值千金。
朋友相資，謂之筆硯同事；
師生相繼，謂之衣鉢真傳。
篤志業儒，磨穿鐵硯；
棄文就武，安用毛錐。
劍有干將、鏌鋁之名；
扇有仁風、便面之號。
小舟名曰蚱蜢，巨艦號曰艨艟。
金根是皇后之車，菱花乃婦人之鏡。
鑿落原爲酒器，參差乃是簫名。
刻舟求劍，固而不通；
膠柱鼓瑟，物而不化。
斗筲言其器小，棟梁謂是大材。
鉛刀無一割之利，強弓有六百石之名。
杖以鳩形，因其不噎；
鑰同魚目，取其常醒。
兜鍪係是頭盔，叵羅乃爲飲具。
短劍稱爲匕首，氈毼卽是氈毯。
鼠鬚筆，風字硯，供王右軍之書。
鸕鶿杓，鸚鵡杯，飲李太白之酒。
琴名綠綺焦桐，弓號烏號繁弱。
香爐謂之寶鴨，燭臺謂之燭奴。

龍涎雞舌，香之美名；
鷓首鴨頭，船之別號。
壽光是妝臺無塵之鏡；
長明是梵堂不滅之燈。
桔槔卽田家之水車，襜褕乃農夫之雨具。
夜可擊，晝可炊，軍中刁斗；
雲漢熱，北風寒，室里畫圖。
勉人發憤，猛著祖鞭；
求人恕罪，幸開湯網。
拔幟立幟，淮陰之計甚奇；
得弓失弓，楚王所見未大。
董安于佩弦以自勉，西門豹佩韋以自寬。
孟敏墮甑不顧，楚妃守符而亡。
溫嶠燃犀，照見水族；
秦皇懸鏡，洞矚邪心。
車載斗量，庸流不可勝數；
南金東箭，奇材實是堪誇。
傳檄而定，極言敵之可敗；
迎刃而解，甚言事之易成。
是故以銅爲鑑，僅可以整衣冠；
必也以古爲鑑，斯可以知興廢。

珍寶

山澤之精英，每洩爲至寶；
乾坤之瑞氣，恆結爲奇珍。
故玉足以庇嘉穀，珠足以禦火災。
魚目豈可混珠，碲砮奚能亂玉。
黃金生於麗水，白銀出自朱提。
曰孔方、曰家兄，俱爲錢號；
曰青蚨、曰鵝眼，亦是錢名。
可貴者，明月夜光之珠；
可珍者，璠瑜琬琰之玉。
宋人以燕石爲玉，什襲而藏；
楚王以璞玉爲石，兩刖其足。
魏侯之珠，光照十二乘；
和氏之璧，價重十五城。
鮫人泣淚成珠，宋人削玉爲楮。
賢乃國家之寶，儒爲席上之珍。
賢主聘士，束帛加璧；
眞儒抱道，懷瑾握瑜。
雍伯種玉，而得美婦；
太公釣璜，而遇明君。
剖腹藏珠，因貪財而殞命；
纏頭用錦，乃助舞以添嬌。
孟嘗廉潔，合浦還珠；
相如勇忠，秦廷完璧。
釵作燕飛，漢宮之異事；
錢成蝶舞，唐庫之奇聞。
多錢固有神通，營財乃爲鬼笑。
以此致彼，謂之拋磚引玉；
以賤失貴，謂之買櫝還珠。
賢否莫辨，謂之玉石俱焚；
貪吝無厭，謂之錙銖必算。

崔烈買官，人特嫌其銅臭；
蘇秦拜相，嫂亦畏其金多。
天雨錢，以助熊衰之葬；
天雨金，以濟仲儒之貧。
楊公以養廉而辭金，唐帝以懲貪而賜絹。
雖曰匹夫，不可懷璧，然而人生誰不需財。
床頭金盡，遂致壯士無顏；
囊內錢空，未免阮郎羞澀。

貧富

命之修短有數，人之富貴在天。

君子安貧，達人知命。

貫朽粟陳，稱羨多財之謂；

紫標黃榜，封記府庫之名。

貪愛財貨，謂之錢愚；

喜置田產，謂之地癖。

守錢虜譏不能散；

落魄子歎其無依。

貧無立錐，富連阡陌。

室如懸磬，言其空匱；

家無儋石，言其赤貧。

絕糧曰在陳，多財曰錢癖。

富足曰殷實，偃蹇曰數奇。

濟急如決水以活鮒魚，乞糧則登山而呼庚癸。

家徒壁立，司馬之貧；

屢屨爲炊，百里之厄。

鵠面菜色，窮民無告之形，易子析骸，軍士乏糧之慘。

餓死留君臣之義，千古夷齊；

貲財敵王公之富，一時陶猗。

殺妓侑酒，豪橫非常；

食費萬錢，奢華太過。

二月賣絲，五月糶穀，洵爲剜肉醫瘡；

三年餘一，九年餘三，庶遇凶荒有備。

貧士腸習藜藿，富人口厭珍饈。

蠟代薪，飴沃釜，何其侈也；

甌生塵，釜生魚，不亦廉乎。

捉襟肘見，納履踵決，貧者士之常；

數米而飲，稱薪而爨，吝則實可鄙。

總之，飽德之士，不願膏粱；

聞譽既施，奚須文繡？

疾病凶喪

福壽康寧，人所同欲；
死亡疾病，世不能無。
問疾曰玉體違和，自謙曰適沾微恙。
偶爲造化小兒所苦，豈是實沈臺駘爲祟。
病在膏肓曰弗瘳，喜其勿樂曰無恙。
臥病爲采薪之憂，腹疾爲河魚之患。
瘡不病君子，病君子乃爲瘡耳；
卜所以決疑，既不疑又何卜哉？
謝安夢雞，悟太歲之在酉；
楚王吞蛭，羨厚德之及人。
屬續易筮，言人將死；
鬼錄物故，謂人已亡。
親死曰丁憂，又曰丁艱；
居喪曰守制，又曰讀禮。
在牀爲尸，在棺爲柩；
報孝爲訃，慰孝爲唁。
寢苦枕塊，哀父母之傾逝，節哀順變，勸孝子之惜身。
曰崩、曰薨、曰卒、尊卑各異其稱，曰死、曰夭、曰殤，修短各因其分。
孤子、哀子，居喪自痛之詞；
失怙、失恃，父母俱亡之謂。
父死曰考，考者成也；
母死曰妣，妣者媿也。
自泣血、稽顙之外，又有大祥、小祥之殊；
自斬衰、齊衰之下，又有大功、小功之別。
三月之服爲總麻，三年將滿爲禫服。
王父歿則嫡孫杖期，長子亡則嫡孫承重。
死者之器曰明器，孝子之枚曰哀杖。
財物助喪謂之賻，車馬助喪謂之贈。

以衣殮身謂之襚，以玉實口謂之琯。
送喪曰執紼，舉柩曰駕輻。
卜地曰牛眠，封土曰馬鬣。
墓石原名翁仲，丹旒今號銘旌。
輓歌始自田橫，墓誌創於傅奕。
生墳曰壽藏，死墓曰佳城；
安葬曰瘞玉，弔奠曰束芻。
窀穸、夜臺，告窆之謂；
祔、禘、烝、嘗，致祭之名。
飲杯捲而口澤如存，讀父書而手澤未泯。
高子羔悲親而泣血，卜子夏哭子而喪明。
王裒痛父，門人廢詩；
王修哭母，里人輟社。
樹靜而風不息，皋魚增感，椎牛不若雞豚，曾子興
思。
故爲人子者，當知木本水源；
念爾祖者，更宜慎終追遠。

文史

名士才儲八斗，鴻儒學富五車。
三墳五典，古聖之真傳；
七緯九經，先民之秘要。
尚書皆虞、夏、商、周之政事；
周易乃羲、文、姬、孔之精微。
二戴俱刪禮記，故曰戴禮；
二毛皆注詩經，故曰毛詩。
孔聖修春秋，因獲麒麟而絕筆；
太公論韜略，悉假虎豹以名篇。
縑緇、黃卷，總謂經書；
雁帛、魚書，通稱簡札。
錦心繡口，李供奉之詞章；
鐵畫銀鈎，王右軍之字法。
雕蟲謙藝學之卑，倚馬誇文思之捷。
別來三日，便當刮目相看；
面壁九年，方能有此神悟。
五鳳譽其精奇，七步稱其敏速。
詩之工者，壓倒元白；
才之高者，媲美班揚，晁大夫以多智而號智囊；
王仁裕以能詩而稱詩窖。
自古詩人推李杜，至今字學仰鍾、王。
陽春白雪，難和難賡；
萬選青錢，屢試屢中。
文賦之雄，可驚神而泣鬼；
音詞之妙，每遏雲而繞梁。
涉獵不精，乃好博之弊；
咿唔不輟，是勤讀之功。
以賂匈文，謂之潤筆；
因書得粟，謂之舌耕。
文不加點，機杼自成一家；

字無空設，詞意俱從百煉。
機線之才甚短，記問之學必膚。
曳白乃應試無文，殺青亦風流罪過。
裁詩之苦，費其推敲；
曠學之弊，在乎作輟。
文章浮薄，何殊月露風雲；
典籍儲藏，皆在蘭臺石室。
祖龍無道，焚書坑儒；
唐帝右文，開科取士。
依樣葫蘆，正謂行文之剿襲；
潦草塞責，不求下語之精詳。
異端左道，邪說橫流；
肄業藏修，讀書攻苦。
作文曰染翰操觚，請業曰執經問難。
求文曰乞如椽筆，譽美曰是大方家。
共羨佳章，洛陽紙貴；
喜於答問，明鏡不疲。
藏書稱爲鄴架，嗜學號爲書淫。
樂天七月，便識之無；
長吉七歲，作高軒過。
開卷有益，賢君之要語；
不學無術，權相之爲人。
劉向校書芸閣，丙夜燃藜；
孫康執卷茅簷，隆冬映雪。
李白夢筆生花，文藻大進；
揚子夢口吐鳳，詞賦愈奇。
李守素號爲人物志，虞世南呼爲行秘書。
韓公文望尊隆，泰山北斗；
程子涵養潤澤粹，良玉精金。
含英咀華，咳唾隨風生珠玉；
包今統古，賦詩擲地作金聲。

抄書至數十篋，無非向學之勤；
徒居載三十車，皆云稽古之力。
是以慕丁顓之義訓，聚書必興；
更宜守杜暹之良規，鬻書不孝。

科第

士人入泮曰采芹，舉子登科曰釋褐。
賓興爲大比之年，賢書卽鄉試之錄。
鏖戰棘闈，青錢中選；
榮膺鶚薦，席帽離身。
鹿鳴以榮文榜，鷹揚以耀武科。
文章中式，望朱衣之點頭，經術旣明，取青紫如拾芥。
宴罷曲江，快紅綾之賜餅；
名登天府，羨柳汁之染衣。
特拔謂之出頭地，崛起謂之破天荒。
中狀謂之占鰲頭，發解謂之魁虎榜。
賜宴瓊林，宋朝盛典；
探花杏苑，唐世殊恩。
主司稱爲座主，衣鉢相傳；
同榜皆是同年，姑蘇大會*。
貢籍見遺，龍門點額；
公車獲雋，雁塔題名。
金殿唱第曰傳臚，鄉會放榜曰撒棘。
攀仙桂、步青雲，皆言及第；
紅勒帛、孫山外，總是無名。
詩美作人，程試卽薪樵之典；
易推連茹，進賢乃彙征之途。
入彀英雄，喜羅多士；
滿城桃李，賀得門生。
慰人之下第，則曰賺了英雄；
憐士之無依，亦云榜誰門戶。
雖然有志者事竟成，佇有榮華之日；
信乎成丹者火候到，莫辭烹煉之功。

制作

上古之世，政尙結繩；
蒼頡挺生，制爲文字。
河馬負圖，羲畫八卦；
洛龜呈瑞，禹列九疇。
刻漏挈壺所司，甲子大撓所造。
算數作於隸首，律呂制自伶倫。
甲、冑、舟、車，俱軒轅之創始；
權、衡、度、量，悉黃帝之立規。
章亥紀步數以定極，伯鯨築城郭以衛民。
太昊造網罟以佃漁，少昊作弧矢以戰伐。
制耒耜，興陶冶，皆由炎帝；
造琴瑟，作杵臼，乃自羲皇。
冠裳之制，至有熊而大備；
蠶桑之利，由元妃而始興。
神農嘗百草，醫藥有方；
后稷播五穀，粒食攸賴。
鑽木取火，而烹飪初興；
構木爲巢，而宮室始創。
夏王鑄鼎，以象九州；
漢帝建寺，以崇佛教。
指南車創自姬周，羅盤是其遺制；
渾天儀肇於炎漢，歷家始有所宗。
秦始皇築萬里長城，魏文帝敘九品官秩。
蕭相國造千秋律令，叔孫通定百職朝儀。
大篆小篆，各異其名；
圍棋象棋，各別其用。
詩賦遴才，李唐之盛典；
文章取士，趙宋之成規。
經書印自馮道；
通鑑編自溫公。

雁塔載於佛經，梨園著於唐史。
恬筆倫紙，固文房寶玩；
和弓垂矢，亦武庫良材。
凡古昔之前型，爲今時之利用。

藝術

醫士業擅岐黃，稱爲國手；
地師技精青烏，號曰堪輿。
盧醫、扁鵲，古之神醫；
王墨、鄭虔，古之名畫。
郭景純得青囊祕術，孫思邈傳龍府仙方。
善卜乃君平、詹尹之流；
善相爲唐舉、子卿之亞。
推命謂之風角，繪畫謂之丹青。
大風鑑相士之稱；
大工師匠人之號。
王良造父，馭駕最精；
東方淳于，滑稽無匹。
稱卜筮者，世之鬼谷；
稱記怪者，鬼之董狐。
稱誦日之人曰太史，稱書算之士曰掌文。
善博者喝雉呼盧，善射者穿楊貫虱。
檣蒲之戲，乃言雙陸；
橘中之樂，是謂弈棋。
陳平作傀儡以解圍，孔明造牛馬以運米。
僧繇點龍睛而破壁，公輸削木鳶而高飛。
雖奇技似無益於人，而百藝期有濟於用。

訟獄

人惟不平則鳴，世以無訟爲貴。
上果哀矜，喜見桁楊雨潤；
下無冤枉，欣看肺石風清。
誰謂囹圄爲福堂？
須知畫地可立獄。
構訟則雀角相爭，訴冤則覆盆得雪。
獄門畫狴犴之形，以其能守；
聽訟在棘木之下，貴乎不冤。
鄉亭有岸，朝廷有獄，下之人誰敢作奸犯科；
死不可生，刑不可贖，上之人自當原情定罪。
夏之獄名鈞臺，商之獄名羸里。
桎梏所以械繫，縲紲所以拘攣。
兩爭不釋，鷓蚌相持；
累及無辜，池魚被害。
下車泣罪，夏王深痛其民；
入甕承招，唐史*自作之孽。（周興）
紛爭謂之健訟，訐告謂之株連。
排解謂之釋紛，裁冤謂之嫁禍。
徒配有城旦之名，流戍卽充軍之謂。
三尺乃朝廷之法，三木亦罪犯之刑。
古之五刑：墨、劓、剕、宮、大辟；
清之律例：笞、杖、徒、流、死罪。
削木爲吏，上古之淳風安在；
縱囚歸省，唐宗之盛德可嘉。
花落庭閑，草生獄靜，何公治民之簡；
吏立冰上，人行鏡中，盧君折獄之清。
雖曰治亂之藥石，刑罰爲重；
要知興平之梁肉，德教爲先。

釋道鬼神

如來爲佛家之祖；
老君爲道教之宗。
鷲嶺祇園，皆云佛國；
交梨火棗總是仙丹。
沙門稱釋，始於晉之道安；
中國有佛，肇於漢之明帝。
彭祖八百遐齡，旌陽一家升舉。
波羅猶云彼岸，紫府卽是仙宮。
曰上方，曰梵剎，俱爲選佛之場；
曰紺宇，曰珠宮，悉是遊仙之境。
伊蒲饌可以齋僧。
青精飯可以延壽。
香積廚，僧家所饌；
玉麟脯，仙子所餐。
履葦渡江，咒蓮生鉢，佛氏玄機；
喫酒滅火，吐飯成蜂，仙家妙用。
吳猛揮扇，畫江成路；
麻姑撒米，遍地丹砂。
導引胎息，道士之修持；
飛錫坐禪，僧人之行止。
僧家禮拜曰和南，道家禮拜曰稽首。
曰圓寂，曰荼毗，悲溜流之已故；
曰仙遊，曰尸解，悼羽士之云亡。
女巫男覲，自古攸分；
男僧女尼，從來有別。
羽客黃冠，皆稱道士；
上人德士，並美高僧。
檀越檀那，僧家之稱施主；
燒丹鍊汞，道士之學神仙。
和尚自謙，爲空桑子；

道士誦經，謂步虛聲。

菩者，普也；

薩者，濟也；

故有菩薩之號。

水行惟龍，陸行惟象，故有龍象之稱。

儒謂之世，釋謂之劫，道謂之塵，言俗緣之未脫；

儒云致一，釋云三昧，道云貞一，知奧義之無窮。

達摩隻履西歸，王令雙鳧下降。

凝神辟穀，仙家服氣煉形；

不生不滅，釋氏明心見性。

談經入妙，可使巖石點頭，天花飛墜；

煉丹既成，能令龍虎降伏，雞犬俱升。

藏世界於一粟，佛力何其大歟！貯乾坤於一壺，道

法何其玄也！

無鬼論作於阮瞻；

搜神記撰於干寶。

顏淵，子夏，死爲地下修文；

韓相，寇公，歿作閻浮王者。

至若水神曰天吳，旱鬼曰旱魃。

魑魅魍魎，山川之崇；

神荼鬱壘，守禦之神。

仕途偃蹇，路鬼不免擲揄；

心地光明，吉神自爲呵護。

鳥獸

龍爲鱗蟲之長，虎乃諸獸之王。
麟鳳龜龍，謂之四靈；
犬豕與雞，謂之三物。
驂騮、駉馱，皆馬之號；
太牢、大武，乃牛之稱。
羊曰柔毛，又曰長髯主簿；
豕云剛鬣，又云烏喙將軍。
鵝名舒雁，鴨號家鳧；
雞有五德，鳳備九苞；
家豹烏圓，貓之美譽；
韓盧楚獷，犬之別名。
麒麟騶虞，俱爲好仁之獸；
螟螣蝻賊，皆是害稻之蟲。
無腸公子，螃蟹之名；
綠衣使者，鸚鵡之號。
狐假虎威，謂借勢而爲惡；
養虎貽患，謂留禍以累身。
猶豫，喻人之多疑；
狼狽，比人之相倚。
勝負未分，不知鹿死誰手；
基業易主，正如燕入他家。
雁到南方，先至爲主，後至爲賓；
雉名陳寶，得雄則王，得雌則霸。
刻鵠類鶩，爲學而未成；
畫虎類犬，弄巧而反拙。
美惡不稱，謂之狗尾續貂；
貪謀不足，謂之巴蛇吞象。
前門拒虎，後門進狼；
言禍之繼至；
不入虎穴，焉得虎子，言事之必成。

趨利，如群蟻之附羶；
愛子，如老牛之舐犢。
無中生有，何異蛇添足；
進退兩難，有似羝之觸藩。
杯中蛇影，自起猜疑；
失馬塞翁，難分禍福。
龍駒誇陸士龍之異，鳳雛稱龐士元之奇。
王猛捫蝨而談世務，甯戚飯牛而取上卿。
楚王式蛙怒，以其敢死；
丙吉問牛喘，恐其失時。
以十人而制千虎，比事之難；
走韓盧而搏騫兔，喻事之易。
有勢莫能爲，雖鞭之長，不及馬腹；
制小安用大，割雞之事，焉用牛刀。
食母之鳥曰鳧，食父之獸曰獍。
鵲鳩以喻弟昆，鳳凰比夫婦。
腰纏騎鶴，謂富貴而登仙；
瞎馬臨池，謂逼人之險語。
黔驢之技止此，鼯鼠之技易窮。
強兼併者曰鯨吞，爲小賊者曰狗盜。
隋珠彈雀，譬得少而失多；
投鼠忌器，恐爲甲而傷乙。
事多曰蝟務，利微曰蠅頭。
心惑曰狐疑，色喜曰雀躍。
愛屋及烏，謂因此而惜彼；
輕雞愛鶩，謂舍此而圖他。
唆惡而使爲非，教獠升木；
受恩而不知報，得魚忘筌。
倚勢害人，真似城狐社鼠；
空存無用，何殊陶犬瓦雞。
勢不能敵，猶螳臂之當車；

人生速死，若蜉蝣之在世。
以小而欲制大，越雞奚能伏鵠卵；
以賤而反輕貴，鸞鳩何必笑大鵬。
跖犬吠堯，固曰吠非其主；
鵲巢鳩佔，居然安享其成。
緣木求魚，極言其難得；
按圖索驥，又恐其失真。
惡人借勢，如虎之負嵎；
窮人無歸，如魚之失水。
九尾狐，譏其太姦；
獨眼龍，誇其有勇。
指鹿爲馬，趙丞相之欺君；
叱石成羊，黃初平之得道。
卞莊勇能擒兩虎，高駢射可貫雙雕。
鷦鷯巢林，不過一枝；
鼯鼠飲河，不過滿腹。
人之所棄，有如孤雛腐鼠；
人之所仰，比於起鳳騰蛟。
魚遊釜中，偷生不久；
燕巢幕上，棲止不安。
妄自稱奇，譬如遼東之豕；
所見甚小，譬之井底之蛙。
出人頭地，鶴立雞群；
非偶相從，雉求牡匹。
天上石麟，誇小兒之邁眾；
人中騏驎，比名士之超凡。
怡堂燕雀，不知後災；
甕裏醯雞，安能廣見。
馬牛而襟裾，謂人之無禮義；
沐猴而冠帶，謂人之不恢宏。
羊質虎皮，言其有名無實；

守株待兔，言其抱拙無能。
鮒魚待西江水，比人之甚窘，蛟龍非池中物，比人之有爲。
執牛耳，尊人主盟，附驥尾，望人汲引。
鴻雁哀鳴，悲下民之失所；
狡兔三窟，譏貪夫之巧營。
風馬牛勢不相干，常山蛇首尾相應。
百足蟲死而不僵，千歲龜死而留骨。
大丈夫寧爲雞口，毋爲牛後；
士君子豈甘雌伏，定要雄飛。
毋侷促如轅下駒，毋委靡如牛馬走。
人有禮義，庶免相鼠之刺；
徒能言語，何異禽獸之心。

花木

植物非一，有萬卉之稱；
穀種甚多，有百穀之號。
如茨如梁，謂禾稼之蕃；
惟夭惟喬，謂草木之茂。
蓮花比之君子，海棠號曰神仙。
國色天香，詠牡丹之富貴；
冰肌玉骨，賦梅萼之清奇。
蘭爲王者之香，菊有隱逸之趣。
竹稱君子，松號大夫。
萱草可以宜男，屈軼自能指佞。
篔簹乃竹之類；
木樨，亦桂之名。
明日黃花，過時之物；
歲寒松柏，勁節之稱。
樗櫟無用之材，榿楠勝任之木。
玉版，筍之異號；

蹲鴟，芋之別名。
瓜田李下，事避嫌疑；
秋菊春桃，時來遲早。
南枝先，北枝後，庾嶺梅舒；
朔而生，望而落，堯階蕞蕞。
苾蒨背陰向陽，比僧人之有德；
木槿朝開暮落，喻榮華之不長。
芒刺在背，言人恐懼不安；
薰蕕異氣，謂人賢否有別。
桃李雖無言，而下自成蹊；
苦李生道旁，則爲人所棄。
老夫娶婦，枯楊生稊；
國家進賢，拔茅連茹。
蒲柳未秋而先槁；
薑桂愈老而益辛。
王者之師，勢如竹破；
七雄之國，地若瓜分。
苻堅疑，草木皆爲敵兵；
索靖艱，銅駝會在荊棘。
王家手植三槐；
竇氏人稱五桂。
鉏麇觸槐，不忍賊民之主；
越王嘗蓼，必欲報吳之仇。
歐陽母畫荻教子，誰不稱賢；
廉將軍負荊請罪，善能悔過。
彌子以餘桃啖君；
商君欲徙木立信。
賣李鑽核，王戎之鄙吝；
剪桐封弟，天子無戲言。
齊以二桃殺三士，唐謂蓮花似六郎。
啖蔗漸入佳境，蒸梨便失本真。

煮豆燃萁，比兄之殘弟；
斫竹遮荀，棄舊而憐新。
元素致江南之柑，吳剛伐月中之桂。
濟友法堯夫之助麥，敬君效野人之獻芹。
冒雨剪韭，款友之情甚殷；
踏雪尋梅，自娛之興最雅。
商王能修君德，不畏祥桑；
萊公有惠民生，再生枯竹。
蟠桃之開花結子，每三千年；
大椿之爲春爲秋，亦八千歲。
去稂莠，正所以植嘉禾；
沃枝葉，則不如培根本。
故世路之藜蕪當剔，而人心之茅塞須開。